



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma : Tir Yimiyim

tiryimiyim@aolima

tir yimiyim

TAPAK 3

Philippines Tir Duterte-i COVID-19 vaccine maginertem amokmeren

NIA okadaki ken o ka nung Akhil Gogoi metentsü



VOL. XVIII NO. 249 (ADOK 249) DIMAPUR

RASEMNÜ (WEDNESDAY)

AAMI (JUNE) 23, 2021

₹ 5.00

## SSA & RMSA 2020, 2013 tesayurtem atema luden ka tentet

**Kohima, June 22, 2021 (TYO):** Nagaland sorkari SSA & RMSA 2020, 2013 batches anioxsemsü atema luden ka tentetogo.

June 14th, 2021 nü SSA & RMSA 2020 & 2013 batches anioxsü atema Task Force on senden nung lemtetba ama sorkari iba luden tentet.

Iba luden ya school/tesayurtem rationalization/redeployment, school tem clubbing/merging aser State Cadre dena 'un-trainable' tesayurtem nem "Golden Handshake" mesüra Voluntary retirement Scheme (VRS) agütsütsü atema inyakyim latetsü, ta Nagaland sorkar

atema state secretary, Kevileno Angami-i ashi.

Iba luden nung Jt. Secretary, School Education Nokchashashi Chairman aser Statistical Officer, School Education Tsupithong Member Secretary asütsü. Tena den tanüngba züngemsemtemji Director, School Education Wonthungo Tsopoe, Asst. Director, School Education Etsongoi, Sr. Account Officer, School Education Lemya aser Programme Manager, Samagra Shiksha Nuchyi nung asütsü.

July 17, 2021 tashi nung ludeni sorkar nem osang agütsütsü, ta state secretary Kevileno-isa ashi.

## Tuensang nung Oxygen Generator Plant lapokogo

**Dimapur, June 22, 2021 (TYO):** Mongulbarnü Chief Minister, Neiphu Rio-i District Hospital, Tuensang nung Oxygen Generator Plant lapoktsüogo.

Tuensang nung Oxygen Generator Plant ya Nagaland sorkar, UNDP aser Government of Japan to India nung yaritepa yanglu.

Tanü Neiphu Rio-i o jembidang Government of Japan to India aser UNDP dang pelaba metetdaksü.

"Nagaland ya district 12 aliba state tila ka lir aser Kohima, Dimapur o Mokokchung nung dang oxygen generator plant amenoka liasü. Saka tang Tuensang nung aser iba sülen Phek nung Oxygen Generator Plant amenokba ajanga state health sector nung terenlok tulu angutsü" ta pai ashi.

"Oxygen Generator Plant ajanga wara mapang meta talang pilar aliba district nung nisung takütem kümzükba dang masü saka tarutsü anogotem nunga

tajangzük angutsü. Tuensang district nung tanga nija mozü kitem mali anungji District Hospital-i technical support aser facilities ajanga tongti shilem agütsüla" ta CM Rio-isa metetdaksü.

Sentong nung Health & Family Welfare Minister, Pangnyu Phom-ia wara mapang UNDP aser Government of Japan to India-i teyari tulu agütsüba atema pelaba metetdaksü.

Sentong nung mendenji Tuensang Deputy Commissioner, Kumar Ramnikant liasü, Head Health & Governance UNDP, Dr. Manish Pant-i tesentepertem pelaa agizük aser CMO Tuensang, Dr. Lanu Chuba-i anküp tepela o jembi.

Iba sentong nungsa MLA, H. Chuba Chang, MLA, Toyang Changkhong, Deputy Resident Representative, Nadia Rashid; Principal Secretary H&FW, Amardeep Bhatia; Principal Director, H&FW; DIG; SP aser MS, Tuensang nung aden.

## Nagaland sorkari sen tim mesüi amshiba bushisüngdangtsüla: NPF

**Dimapur, June 22, 2021 (TYO):** CIHSR nung yipden 200 Acute Care Facility (ACF) yanglutsü tenangzüktep agiba aser ano CIHSR Director Dr. Sedevi Angami-i osangkaket ka dang ashiba atema NPF Legislatures Party-i ashishiteper aser bushisüngdang asütsü takhangba agütsüogo.

"Nagaland state sorkari temelaba shitak magüi CIHSR nem Rs. 30 crores agütsüogo anungji state sorkari senotsü tim mesüi amshibatem India sorkar nungi Investigative agency ka ajanga bushisüngdang asütsü akhanger" ta NPF Legislature Party-i Nagaland Governor dangi shidi ka zülüogo.

"May 27, 2005 nung tang teinyakdak Chief Minister Neiphu

Rio-i CM inyakba mapang iba MOU nung sign aser iba mapang tang Cabinet nung alir ka dang densema mali. MOU sign asügang tang aliba NPF MLA tem Cabinet nung liasü aser MOU nung telok asemprong atema teinyaktsütem lateta lir," ta NPF Legislature Party, Spokesman Imkong L. Imchen-i sangdong ka nung ashi.

Iba MOU nung telok asemji, mezüngbuba nung Christian Medical College Vellore Association ta register süa aliba Christian Medical College & Hospital Vellore, Tamil Nadu, tanabubaji Nagaland sorkar aser tasembubaji Emmanuel Hospital Association 808/92 Deepali Building, Nehru Place New Delhi lir, ta paisa ashi.

## COVID-19 Nagaland: Nisung 21,513 taneptsü nguogo; 1,757 anepalur

**Kohima, June 22, 2021 (TYO):** Nagaland nung tanü agi anogo 17 buba COVID-19 puteter dang nungibo taneptsü angur timba liasü. Tanü COVID-19 puteta alir nisung 146 taneptsü angu aser 64 dak putet.

"Mongulbarnü nisung 46 dak COVID-19 aliba putet. Parnokji Dimapur nung 22, Mokokchung nung 12, Kohima nung 10, Peren nung 8, Mon nung 4, Wokha o Longleng nung anana (2) aser Kiphire, Phek, Tuensang o Zunheboto nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni, tanü COVID-19 puteta alir nisung 146 taneptsü angu. Parnokji Dimapur nung 81, Mokokchung nung 39, Kohima nung 16, Phek nung 9 aser Zunheboto nung 1 lir. Parnok züngsema taneptsü angur ajak agi 21,513 kümogo" ta pai metetdaksü.

Nagaland nung COVID-19 nungi taneptsü angur 88.04% kümogo aser tang 1,757 anepalur, ta Dr Kikon-i ashi.

Tanü Dimapur aser Wokha

nung COVID-19 puteta alir nisung kaka asüba züngsema tasür ajak agi nisung 477 kümogo saka nisung 14 bo tanga tashidak ajanga asü, ta Dr Kikon-isa metetdaksü.

COVID-19 alitsü akok ta temolung melemba sample 2,16,598 tendangogo. RT-PCR ajanga 95,717, TrueNat ajanga 60,221 aser Rapid Antigen Test ajanga 60,660 tendang, ta paisa ashi.

"Hombar tashi nung nisung 3,62,135 nem COVID-19 vaccine indang dose 4,17,676 agütsüogo" ta State Immunization Officer Dr Ritu Thurr-ia ashi.

Vaccine agirtemji frontline workers 59,924, healthcare workers 15,760, arishi küm 45 ser temapur 1,40,390 aser arishi küm 18 nungi 44 tsüngda alir 1,46,061 lir, ta paisa ashi.

"Vaccine agirtem rongnung nisung 55,541-i dose anaprong agiogo. Parnokji frontline workers 28,391, healthcare workers 10,374, arishi küm 45 ser temapur 16,775 aser arishi küm 18 nungi 44 tsüngda alir lir," ta Dr Thurr-ia ashi.

## NPF-i TOTAL LOCKDOWN ATEMAASHISHITEPER:

Centre sorkari tuyuba ama COVID-19 positivity rate 5% tashi malu tashi lockdown alitsü state sorkari ashiba atema Nagaland nung opposition telok-Naga People's Front (NPF)-i ashishitepogo.

Nagaland sorkari May 11 nungi state ajungalen total lockdown alitsü tenzüka liasü. COVID-19 positivity rate 5% teküpok aludaktsütsü atema June 16 nü sorkari pezüben atema June 30 tashi total lockdown atsülangogo.

Sorkari positivity rate ajemtsü atema dang ata melii mapa inyakttsüla, ta tanü NPF-i ashi.

NPF-isa state sorkar dang Centre-i kechi tangatetba nung 5% maküm tashi lockdown alitsü tetuyuba agütsü ta asüngdangogo.

"Sorkari district hospital, Community aser Public Health Centre ajak nung medical facility tajungba maküm tashi aser ano doctor, nurse o technician mala nübo agi meperiba manioksem tashi positivity rate malutsü" ta NPF-isa ashi.

## War Room-i COVID-19 maparen ketdangtsüa inyaker

**Dimapur, June 22, 2021 (TYO):** Nagaland nung COVID-19 wara anema inyakba ketdangtsütsü atema April 21, 2021 nü War Room tanaben tenteta liasü, ta Mongulbarnü Nagaland Chief Secretary, J. Alam, IAS-i ashi.

Chief Secretary menden ser War Room ya mapang shitak osang belenshia bangdak department temi mapa inyakttsü tangatetba nung tanaben tentetshi. State Level War Room nung department tongtipangtem nungi ketdangtsürtem shimoka telok balala tenteta mapa inyaker, ta Chief Secretary-isa metetdaksü.

Chief Secretary-isa nübortem dang menungnangi vaccine agütsü aser metsümbui sample tendangtsü atema mepishia metetdaksü.

Paisa tamangba yimsü dak sendakba teloktem, NGOs, Civil Society Organisations (CSOs)-i sorkar den külemi yaritepba atema pelaba ashi.

War Room-i Nagaland nung vaccine agiba maparen anogoshia repranger aser War Room-i yangluba Nagaland COVID-19 information App Google Play aser App store nung lir, ta J. Alam-isa metetdaksü.

State Level War Room ajanga nija aser sorkar mozü kitem nem medical oxygen agütsüba den ICU beds, oxygen supported bed o COVID care centre beds repranger, ta paisa ashi.

War Room-isa quarantine aser home isolation, medical equipment belenba, sorkar mozü kitem nung COVID agi shirangertem anepaluba maparen, rural & peri-urban nung community surveillance aser infographics den social media balala ajanga IEC maparen inyaker, ta Chief Secretary-isa metetdaksü.

Tir Yimiyim

### Covid-19 tashidak nokdangtsü atema senso shia teinyaktsü asem :

**Tangar alidak teti teni tebang nembanga mask temerük agiang;**

**Tangar den tsüktepa tenokdak aser temen;**

**Teti sapon agi teka metsükang.**

## CM Rio-i Tuensang DTF pur den senden amen



Chief Minister, Neiphu Rio-i DC, Tuensang indang Conference Hall nung Tuensang District Task Force for COVID-19 züngsemtem den senden amanba noksa nung angur.

**Dimapur, Aami/June 22 (TYO):** Nagaland Chief Minister, Neiphu Rio-i June 22, 2021 nü Deputy Commissioner, Tuensang indang Conference Hall nung Tuensang District Task Force for COVID-19 züngsemtem den senden mena liasü.

Iba senden nung Deputy Commissioner aser Chairman DTF Tuensang, Kumar Ramnikant ajanga district nung COVID-19 jenjang asadanga lemsatsep aser COVID-19 den raraba mapang timtem ajurubatem lemsatapa liasü.

District atema sorkari teyari agütsüba aser anepaluba atema Tribal Hoho temi pelaba lemsatepba mapang, health sector nung timtem ajurubatemala shisema liasü.

CM Rio-i iba senden nung jembiba mapang sorkari health sector nung temolung agütsüba

indang ashi aser district nung aliba nüburtem kumzüka yua iba tashidak wara koktettsü, ta shia liasü.

Pai Tuensang nung oxygen generation plant terenlok indang jembiba aser sentepa alirtem dang iba facility anepalua amshitsü ayongzüka liasü.

District nung nüburtemi nüngdakba aser aginüba peritsütsü asoshi sorkari sentong balala yangluba indang Minister, Health and Family Welfare, Pangnyu Phom ajanga metetdaksü.

Danga district tem den lirumedema aotsü asoshi Tuensang district nung COVID-19 mozü agiba aser tendangba tsütsü tali asendenshitsu, ta pai ashi aser iba atema civil society, lenir aser tamangba yimsü dak ajemdaker tenteta aliba lokti balala dang shilem agia nüburtem nem

angatetdaksütsü ajungshia liasü.

Tang tashibo mozü agütsü dak alaka danga lenmang kecha mali, anungji nübur ajungai tashi angatepa mozü ya agütsüla, ta Phom-i ayongzüka.

Chief Minister-i district asoshi süoki ia bilemja nüngdakba hadirtem agütsüba aser Oxygen Generator Plant semzüka sentong nung arua adenba asoshi MLA, Toyang Changkhong Chang-i pelaba lemsatapa liasü.

Lockdown sayatsü atema state nung COVID-19 positivity rate ya shilem 5 dang tajemba akumtsüla, saka iba tetetzü tashidak wara samaogo ta ashir masü, saka nisung ajaki COVID-19 nungi jembua alitsü yimyatem amshitsüla, ta Principal Secretary, H&FW, Amardeep S. Bhatia-i ashi.

(Maneni tapak 3 nung...)

## Security Forces temi Pfutsero nung telungpur apu

**Dimapur, Aami/June 22 (TYO):** Security Forces temi Police den lungjemer June 20, 2021 nü Phek district kübok general Kadie Kami yimtsüng nung operation ka agiba mapang Federal Government of Nagaland

(FGN) indang züngsem ka pua liasü, ta osang ka ajanga ashi.

Osang tejangja kar nung ajemdaker operation agiba mapang FGN züngsem ya apu aser pa ket nungi 303 rifle ka den magazine, M20

pistol ka den magazine aser zülubanglu kar nguteta liasü.

Pua alisang den pa ket nungi ngutetba osettem ya maneni bushisüngdangtsü atema Pfutsero Police Station nem amoktsüogo, ta sangdong ajanga ashi.

### GOVERNMENT OF NAGALAND DEPARTMENT OF SCHOOL EDUCATION SECRETARIAT:: KOHIMA

Dated Kohima, the 22nd June, 2021

#### METETDAKTSÜR

NO.DSE/MISC/U-DISE/12-119/2017/530 :: Ministry of Education (MoE), Department of School Education & Literacy, Government of India ajanga tuyuba den bendenloksema, State ajaki "Online Unified District Information System for Education Plus" (UDISE+) ya amshitsüla. School tem (Private schools, Jawahar Navodaya Vidyalaya, Kendriya Vidyalaya, CBSE, ICSE kübok school tem, Central aser State Government kübok school ajak densema) indang data aser osang bendena Ministry of Education ajanga renemba format nung agütsütsüla. Tang aliba UDISE+ kübok school tem indang anogo aser osangtem ya 2020 kum atema bendentsü aser iba maparen ya 2021 kum June tatem tashinung renemtsü sentong lir. Item teinyaktsütem shidak inyakba document ya District/Block level nung online nung upload asütsü.

Data collection/collation indang end result ya ajanga State nung shisaliok jenjang sayutsü aser iba ya ajanga Gross Enrolment Ration (GER), Net Enrolment Ratio (NER), Dropout Rates, Transition Rates aser dangatem agizüktettsü.

RTE (Right to Education) Act mechi data consistency aser mapang shidak nung agütsüba mittsü mechi level ajak nung data bendentsü atema Ministry of Education (MoE) ajanga teinyaktsü yimyatem renemogo.

Anungji School ketdangsur ajak dang pei school indang osang tiazü aser meshidak magütsütsü tekumdangtsü metetdaksür.

UDISE+ formats indang printed/ soft copy ya District Education Officers ajak dangi yokogo aser school shilem 70-i filled-up Data Capture Format (DCF) agüja Ministry of Education portal(https://udiseplus.gov.in) nung upload süogo.

Temonutiba agi June 26, 2021 tashinung pei EBRC/ District Education Officers nem filled-in formats magütsütsü CBSE, ICSE kübok Private schools, Jawahar Navodaya Vidyalaya, Kendriya Vidyalaya amala school tem, Central aser State Sorkar kübok aliba school ajanga atema School Education Department-i non-cooperation clause / de-recognize/ mali ta züngshitsüsa akumtsü.

Sd/-  
(KEVILENO ANGAMA)  
Special Secretary,  
School Education and SCERT.

## NSCN/GPRN (R) ajanga jangjashitsür

**Dimapur, Aami/June 22 (TYO):** Temelaba makai Padumphukri nung NSCN (R) meyong mobile camp ka lapoka aliba shibangtsüogo, ta Dimapur Police ajanga osang sangdongba atema NSCN/GPRN (R) ajanga jangjashitsür, ta NSCN/GPRN (Reformation) indang MIP (Ministry of Information & Publicity) ajanga sangdong ka nung ashi.

Osang ajanga ashiba ama yangji camp/office khenyongi meliasü saka NSCN (R) züngsem kar parnok kibongtem den yangji para agütsür liasü, ta ashi.

Social media nung noksa prokshiba mesüra tsüngtong oa iba tesem reprangba nungi iba tesem ya Office mesüra Camp

ka amenoktsü temsüa ali mali ta metettsü, ta ashi.

Tim mesüi para agüja aliba ki shibangtsüba ajanga NSCN (R) züngsem indang kinungtsü aser tanur tila tem nem tetsübu aser shisabulu agütsür, anungji Police temi tekeratiba nung ki ya lapoktsütsüla, ta sangdong ajanga ashi.

Ki lapoktsütsü asoshi iba temepeshiba yagi nenok temolung nung mokongshira, 'Humanity' mechi nung timtem ajurua aliba kinungtsü, chirnur aser kinunger nem parnok indang aben-süoshi, kaket-longpak, ki oset aser danga tongtipang osettem danga agizükdaksütsüla, ta NSCN (R) sangdong ajangasa ashi.

## Dimapur Police-i tashiyim amshia senotsü meshir apu

**Dimapur, Aami/June 22 (TYO):** NSCN (Khango) tenüng nung Kevijau colony nungi FCI truck tem dang nungi senotsü meshiba ken o nung Dimapur Police temi June 21, 2021 nü arishi kum 27 tain Kakhevi Assumi pua liasü aser pa ket nungi sen 2200 nguteta liasü.

Iba dak sendakba nung ken o ka SBN PS nung züluokogo, ta sangdong ka ajanga ashi.

Maneni June 19, 2021 nü Purana Bazar area nung labour contractor dang sen meshia aliba mapang Dimapur Police-i arishi kum 26 tain Sepelo Koza, 'RSI' NSCN (IM) pua liasü.

Pa ket nungi senotsü meshiba (extortion) slip trok den sen 1000 nguteta liasü. Iba dak sendakba nung ken o ka East Police Station, Dimapur nung züluokogo, ta sangdong ajanga ashi.

## Mon nung yipten 70 aliba COVID Care Centre ka lapokogo



**Kohima, Aami/June 22 (TYO):** Mon nung yipten 70 aliba COVID Care Centre (CCC) ka Deputy Commissioner, Mon, Thavaseelan K, IAS ajanga June 22, 2021 nü sayatsüogo.

Iba centre sayaba sentong nung jembiba mapang, CCC atema telok balala teyari agütsüba, talisa Eleutheros

Christian Society Tuensang aser danga lokti tentet tem dang Deputy Commissioner, Mon ajanga pelaba lemsatapa liasü.

Iba COVID Care Centre tasenba ya Youngrichum Sangtam, Pastor, Sangtam Baptist Lithro, Mon ajanga meshiteta sarasademtsü.

(Maneni tapak 3 nung...)

## Muslim Council Dimapur ajanga asükhu lemsatep

**Dimapur, Aami/June 22 (TYO):** Dimapur nung nübu tejangja aser Asür Lomithi Sema'er jabaso tambusang, Akuto L Yeptho mapang tatsüka shiranga arur June 17, 2021 nü Guwahati nung mozüki ka nung asü, ta osang angashia Muslim Council Dimapur kanga sasar, ta Muslim Council Dimapur indang working president, A. Rahman-i sangdong ka nung ashi.

Asür Akuto Yeptho ya kin ajunga nungi tepetzük jenjang nung alirtem asoshi, talisa Dimapur kübok Signal area aser

Lomithi Colony nung alirtem asoshi tebu ka amai liasü aser pai makamaiter dang aria bilemba yong pa dang "BABU" ta ja liasü, ta ashi.

Pa ama nübu tajung ka asüba ya Muslim nunger asoshi tembar tajung ka samaogo, shibai council den mapang balala nung yaritepa aru.

Dimapur nung aliba Muslim nungertem tenüng nung MCD ajanga Kotak nung pa nem tesem ka agüjang ta sarasademtsür aser kinungertem den asükhu lemsataper, ta sangdong ajangasa ashi.

# Assam Rifles-i Mizoram nung tapoktsü aika angu



**Aizawl, June 22, 2021 (Agencies):** Mizoram kübok Serchhip district nung Assam Rifles-i tapoktsü aika ngutetogo. Assam Rifles sepaitemi Farkawn tesem nung detonators 4000, special detonators 3000 aser

electric detonators 925 angu. "Tapoktsü aliba bosta 63 tashi ngutetogo. Bosta shia nung Class II CAT -ZZ explosive powder packet 10 nung seret 2.08 enoka liasü aser ajakji meyojteper ton 1.3104

liasü" ta Assam Rifles-i sangdong ka nung metetdaksü. Iba tesem nungisa safety fuse metres 2000 tashi ngutetogo aser iba dak sendakba nung nisung ana puogo.

# NIAokadakenokanungAkhilGogoi metentsü

**Guwahati, June 22, 2021 (Agencies):** Mongulbarnü tepuokdak yua aliba Krishak Mukti Sangram Samiti (KMSS) lennir Akhil Gogoi ken o ka nung temeten nguogo. Citizenship Amendment Act (CAA) anema lungkak aitba dak sendakba nung Gogoi ya ken o ana nung tai tonglokja lir. Taküm Assam Assembly election nung Gogoi-i tepuokdak nungi dang Sivasagar constituency nung toktepa takok angu. Guwahati nung National

Investigation Agency (NIA) court-i pa CAA anema lungkak aitba ken o ka nung temeten agütsü. December 2019 nungi Gogoi ya tepuokdak ayu. Taküm April pa pa nem ken o ka atema bail agütsü saka NIA-i iba anema ken o benoka liasü. Gogoi-i nisung 600 shi anir rongsenketsüng mokdang, lung agi aon aser police ka tepset ta tai tonglokja lir. Ajisüaka, Gogoi ya ano tanga ken o ka atema maneni tepuokdak ayutsü.

# Meghalaya nung Star Cement anema signature campaign agir

**Shillong, June 22, 2021 (Agencies):** Meghalaya nung lisopurtemi Star Cement-i East Jaintia hills district nung mapatong ka inyaksüba anema signature campaign ka tenzüka agir. Star Cement-i Brishyrot yim nung limestone aser shale atutsü atema MoEF&CC-i Environment Clearance agütsüba atema mepelai lisopurtemi signature campaign tenzüko.

platform nung tenzüker aser shidiji Union Minister for Environment, Forest and Climate Change Prakash Javadekar dangi zülü. Deobar anüingdang change.org platform nung iba petition zülü aser iba sülen social media sabang balala nung kanga prokshir. Tanü tashi nung nisung 1,500 jungnüa petition nung sign süogo aser Star Cement nem Environment Clearance ya tim masü kechiyong public dang masüingdangtepi iba mapa inyak ta petition nung shia lir.

Meghalaya State Pollution Control Board (MSPCB)-i asemben tashi public den jembitsü merang saka lisopurtemi magizükba ajanga melitet, ta petition nungsa shia lir. Star Cement-i iba mapatong inyakba ajanga East Jaintia hills district nung lipoküm tsütsü teraksa bentsür arutsü, ta petition nungsa ashi. Jaintia Students Union-ia Hokolbarnü Star Cement nem Environment Clearance agütsüba anema National Green Tribunal (NGT) aser MoEF&CC dangi shidi balala zülüogo.

# Jorhat Special Auction nung süngojok seret nung Rs. 4000 agi ayok

**Guwahati, June 22, 2021 (Agencies):** Hombarnü Jorhat tea e-marketplace nung mezüingbuba International Tea Day Special Auction takok ngua agiogo aser otsüsütsüsa jenjangtem yangluogo. Upper Assam nung Hookhmol, Lankashi, Diroibam, Aideobari Premium, Muktabari, Rungliting Tea Estate, Narayanpur Panbarry, Durgapur, Tirual, Arin, Kathonibari, Friends Tea aser Pabhojan süngojok brand tem iba sentong nung shilem agi. Süngojok ayoktsü bener aruba 93% tema yokdok aser talirtemji Assam, West Bengal, Delhi, Gujarat aser Rajasthan nungi liasü.



International Tea Day Special Auction nung Pabhojan Orthodox tea seret ka nung Rs 4,000 agi ayok. Ano, Diroibam Speciality Green tea seret nung Rs 1000 aser Hookhmol CTC tea seret nung Rs 510 agi yoka liasü. "Mapang tatsüka tsüingda mjunction platform nung ayokba süngojok ya tasen lir. Onoki Hookhmol alizüktetba atema pelar. 2002 nungi Shree Mangalam ta ser onok indang

packet balaka lir aser ozü customers nem Assam süngo tajungtiba agütsütsü" ta Hookhmol CTC seret nung Rs 510 agi alizüker Tea World Director tem- Kamal Sharma aser Pradeep Sharma nati ashi. "Süngojok tajungtem agütsüba atema mjunction team dang pelar" ta Pabhojan Orthodox seret nung Rs 4,000 agi alizükba Shangrila Enterprise nungi Nilesh Divekar-i ashi.

# Mumbai Police-i Arnab Goswami anema chargesheet benok

**Guwahati, June 22, 2021 (Agencies):** TRP tim masüba ken o atema Mumbai Police-i chargesheet benokba nung Republic TV Editor-in-Chief & anchor Arnab Goswami dena lir. Mumbai Police-i tapak 1800 aliba supplementary chargesheet tanabuba agütsüba nung Republic TV kibur pezü dena lir. Parnokji Arnab Goswami, Chief Operating Officer (COO) Priya Mukherjee, Shivendu

Mulelkar aser Shiva Sundaram nunger lir. Mumbai Police commissioner Param Bir Singh-i yaküm iba tim masüba maparen nung Republic TV dena lir ta ashiba sülen ken o ka benoka liasü. Republic TV, Box Cinema, aser Fakt Marathi channel tem dena TRP tim mesüi inyakba maparen ka Mumbai Police-i bushitetogo ta yaküm October ita Param Bir Singh-i metetdakja liasü.

Channel temi viewership teimba akümtsü atema Broadcast Audience Research Council (BARC) nung taoba CEO Partho Dasgupta nem süpokrem agütsü, ta Singh-i tai tongloktsü. TV channel kari rating numbers tim mesüi ajungketer ta BARC-i ken o ka benokba sülen iba inyakyim temai adoka liasü. Tang tashi nung Mumbai Police-i iba ken o dak sendakba nung nisung 13 pua lir.

# Mon nung yipten 70 aliba... (TAPAK 2 NUNGI...)

Iba CCC ya Foundation for Ecological Security (FES) aser Naga American Foundation (NAF) nungi senotsü teyari agüja renem aser District Administration, Mon aser Eleutheros Christian Society ajanga anepalua amenok. Iba CCC ya Mon District Administration, Police, Medical Department aser Mon nung aliba arogo aser civil society temi ketdangtsütsü, ta Hongnao Konyak, CCC member, Management Committee

ajanga metetdaksü. Paise iba CCC ya ita ana atema CCC Management Committee aser medical department nungi team kati anepalutsü, aser tensa dak apet mapang atsülangtsü akok, ta metetdaksü. Iba CCC semzüka sentong nung Deputy Commissioner, Mon den SDO (C) Mon, Lithrila Anar Sangtam; Deputy CMO, Mon Dr. Rongsennungla aser CCC Management Committee züingsemtem dena liasü.



Mongulbarnü Assam nung aliba Manas National Park nung pygmy hogs 8 puokogo. Pygmy Hog Conservation Programme (PHCP)-i June 22 aser June 25, 2021 anogotem Manas National Park nung pygmy hogs 12 tashi pua aliba chioktsü sentong renema lir. (Guwahati, June 22)

# CM Rio-i Tuensang DTF... (TAPAK 2 NUNGI...)

COVID-19 tendangba tsütsü linük nung Nagaland ya teküboktiba jenjang nung lir, anungji iba virus tendangba aser mozü agütsüba maparen nung temolung agütsütsü, ta pai ashi. Yimtsüingtem nung tim mapa inyaka healthcare shidak nüburtem nem agütsütsü asoshi

ASHA nung inyakerkem pei yimtsüing nung alitsüla, ta pai ashi. State nung health system tsütsü sorkar aser department-i tajungtiba nung anepalutsü meranger, aser nungdakba ajunga peritsütsü meranger, ta Principal Director H&FW, Dr. Neikhrielie-ia ashi.



## TIR YIMYIM YIMOBILEM (EDITORIAL)

DIMAPUR RASEMNÜ, AAMI (JUNE) 23, 2021

### Naga yimten saru tebilemstsü

**N**aga yimten tebilemstsü ya India government den tatem küma telemtetba ka maruteti tua-tua aoer asünungji, kodang kechi-komaka ataloktsüar memetetika kümogo. Ano, asenok asoshi tebilemstsü ka bendenlokbaji, kazüa-kazüa Naga yimten tebilemstsü agi sen saruba tebilemstsü küma aoba ya Naga nunger ajak asoshi yimten tebilemstsü dang nungibo tuluba küma odagi. Iba yagi Naga nungertem rongsenren nung akoksaba dang nungibo asenok alima tsüngdang asenok nümamedangtettsüsa akümbajiang maksü aser tebilemstsü tuluba lir. Aji oda, tawa tanüka Covid-19 tongpang nung amshitsü asoshi India government nungi yokba sen nungi shilem ka Naga nunger linük tenzükertem tenüng nung nisung kari meshiba otsü adokbaji tamamangtsüka lir, iba jagi asenok Naga yimten tebilemstsü ya yimten tebilemstsü masü sen saruba tebilemstsüang amato ka kümdaktsüogo. Iba denji ano atentepa tan ita nungsa Dimapur aser Mokochung nung business inyaker telongjem na den ano Confederation of Nagaland Chamber of Commerce and Industry telokia Naga yimten nüchiso bushir teloktem dang business inyakerem dang nungi saru saruba anentsü metetdaksüba jagi, Naga nunger yimten nüchiso bushiba tebilemstsü agi sen saruba tebilemstsüang kümogo ta alima dang sayur. Iba ama Naga nunger rongnung yimten tebilemstsü agi sen saruba tebilemstsü kümer alidang, Nagaland government-i Naga yimten tebilemstsü tatem küma latettsüba maparen nung yariteptsü asoshi 'Core Committee' ka tentetshiba jagi Naga nunger nem teimla tilakabo agütsür. Atangji, iba Core Committee teyari ajanga Naga nunger yimten nüchiso jenjangbo bener marutettsü, kechiyong parnok ajakji India nunger kümer India temzüng kübok tashi angaa yimsüstsü tenangzükba agir yimsüsürtem lir. Ajisüaka, parnok ajakji Naga nunger aser parnok ajak mulungjang nung Naga yimten tebilemstsü ya tekaratiba nung tatem küma latetdaksünüba shisatsü aser tangatetba alitsü. Ibajiang election shia yimten telok ajaki jembir. Iba teimla nung, tang tentetba Core Committee ajangajibo Naga yimten tebilemstsü agi tanga tebilemstsüang tuluba küma maodang telatetba ka dangibo arutettsü imlar. Naga yimten tebilemstsü indang jembidang, Naga nunger ajaki mamatsüba kaji, Naga yimten nüchiso asoshi Naga nungertem timtem, maksü aser reshikangshi aika ajuruogo aser nisung taküma aika tenlaogo. Naga yimten nüchiso bushiba ajanga timtem tekangshi majurudangba Naga nunger kibongbo kata malitsü. Iba tongpang rara nung kenü mesüra kenübo, asenisa mesüaka, oboula otsulai mesüra obala ojalai nokdaker alitsü. Iba ama taküm tenla agüja pei yimten nüchiso asoshi nokdakaka, Naga yimten nüchiso asoshi raraba ya yimten tebilemstsü (political problem) masü saka ozüng raksaba ashi-auer tebilemstsü (law and order problem)-ang kümtsür aliba tia nungi, ano, tanaben shia arua Naga nunger tebilemstsü ya ozüng raksaba tebilemstsü masü saka yimten tebilemstsü ta India government-i agizüka lir. Naga nunger asoshi ibaji yimten temeten indang jembitsü asoshi tajemdakdak onük tongtibang ka lir. Ibaji ajak asoshi yimten telatetba dangi anasai aruba mera tajung ka asütsüla. Ibaji bilema Naga yimten nüchiso bushir teloktemia aser parnok den yariteptsü pur Core Committee purtemia India government den tekaratiba nung telemtetba agitsü merangtsüla. Asenoki asen dak aketba tashi aser mekokmein meteta lir. Yimten tebilemstsü agi tang sen saruba tebilemstsü akümbaji odangbo masü. Sen melira Naga yimtenjia moutetsü aser yimten nüchiso atema rarartema tebok tazüngbo tongpang nung menokdaktettsü. Ajisüaka, mulungsua yimten mapa asoshi tenla agütsür melira, tashiyim agi saru saruabo koba kina aser koba teloka yimten nüchiso asoshi takok ngua meraratettsü aser mejembitettsü. Atangji, ibaji asenok ajaki meteta dang lir, saka yimten tebilemstsü agi saru tebilemstsü küma orr takoksa nung Naga yimten ken o ya metembangdaksünüba agi tanüa yangi tazüngertem den o shilu ka ya lemsateper.

## OLEMSABANG

### WARA TONGPANG TESASHITIBA NUNG RARADI ARUNG, AOLISANGER

-Kumju Jamir, Chumukedima

Alima tesem ajaklen prokshiba wara COVID-19, tanü tensa jema akümba mapang, anungtsüng shitoka, ya anogo tasen atoker alitsü! Ta bilemdang mekorai lia merok mi ama asen Aoli sungkümshi nungpoka aita wara züina aoba osang angashidang kanga tebilemstsü akar. Aser iba Wuhan wara (Kelakba) den ya koda asen-ia sangra sangra raratsü kar aji shisadanga lemsateper.

Hau ni Aolisanger, ya kechi ta ratatsü maliani, yamaji asen taurapur mapanga par tendak tongpang balala rara-a arudang rara tamakok nung tongpang chirepba otsü aika maka, yamaji parnok mapanga poksen wara (Dysentery) agi menepdang pei yim sungküm shibanger pei sasa züsentetba chiyongtsü chia anemponga tongpang akokba otsü lir.

Iba wara (COVID-19) ashikelaksang yimya ya agi asen aoli sobaliba libaliro yimya aowashi ajak raksatsüogo; (1) Teni tepang nempangtsüla (2) Kibok kistem masütsüla (3) Talisa tasü-tama (asükü) nunga metentet, meyaritetba, ano karbo tasü-mang-a kinunger dang mesayui leper dangi bener aoba itemi mesukba, ataloka ajangshia arudang temolung kanga ayanger.

Asen sobaliba raksatsüba kija dang masü, saka Aoli sobaliba ya asen tekümzüker Yisu Khrista tamang yimsu den putepa (Kerak) yimya aika alinungji asen tamang yimsu dak-a kongshir, tekülem ki shibanger, ana asem longjemer sarasadem mesuteter, tasür meyariteteter, yamaji meimchir kinunger asü-yim-e tarlok sena anir aoba angudang sasasete bilemstsür.

Aolisanger asen kin kisüng dak ataloker masü saka yimkong menepba wara asü nungji merongjenli. Saka iba wara tongpang nung ya shir kin-i tajungba azüoker aji asenok mapa lir anungji saksalemshidi, talisa asenoki yimkong temzüng ozüng küpok yimten, Arogo nutsüng, longjemshir, obang ka ser (chi-kü-sa ka sur) iba tongpang ya asen tendak maongka ka ama agizüka khuret sudi.

Asen tetsü tepu mapang letepep tsüngtepep tensa, tejak o tejak na chitepa rarar kin kidong tejangja meteter-ang mangkü agiba otsü lir. Saka iba (COVID-19) ya-agibo meimchir taküm tesulen nungi ateta atsünger aser tesasatsüka tang tashi alima rangpen nung million pezü (4 millions) tashi tepsetba den alima rongsen telongi ludaktsü-a kangshiba den item tanokshiba ajanga yimten yimli chirepa yimsusur menden nungi atsüngdaksüba, aser nungku pentetja nebur tsüngda/ yimten tsüngda tai tonglokja apusotepba yamala tensa agi asen lima sungogo. Yamaji tezüngdangtsü iba wara junga mazüoktetba nung asen India-i anir UK, Brazil, Maxico, USA nungertem lir. Yamaji ano teyip külen reprangdangra iba wara jakla meteta kanga junga azüoktetba yimtitem N. Zealand, Iceland, Singapore, Vietnam lir.

Aolisanger tanü asen mapang (Tendak) ataloktsübatem ya (Takok/ tamakok. Tajung/ tamajung) tarutsü lanu putu-i otsü jembitsü asünungji, tang nungi tali kümshidi, pei-yim sasep nung wara temzüngtem tzü-a mesen (takang) yanglushir talisa yimsusurtem nuken belem aremdang, Arogo (Arogo puri-a) sarasadem medangi asen Tsüngrem Yisu dang mopung ya arjang, meruktetjang ta mepishitsü, nutsüngtem-ia yimten temzüng kübok tashi angatsü, aser talisa temoatsü aliba (Takar) kibongtemi tang ama tensa (tako ajak tanang chitetba tensa) teka sala-a pei akokba lemsatepdi. Talisa jenjang tasak mozü, jenjang magi-a yimkong angati agütsüba mozü sarasadema agir, arok (Ajak) longjemer iba tongpang ya noktakra, mekorai lia Israel nunger dang tetepsetba amang wara suiogo ta ashi medem asenok dang taochi sayutsü teimla mesamali.

Mosai aniba Israel neburtem Egypt sepaitemi nepeta arishia arudang neburtem teimla samar par lenir anemtsü tenzük saka Mosai mekorai lia tamang tulu nung sarasadem, Tsüngremi mopung tesashi yoka tsükchir ajak samatsü aser Israel neburtemi tepelayong ken tena tsüngsangtepep. Iba medem manua melie Aortemi inyaktetogo/ tongpang kokogo ta alimai jembitsü aser pei-peiwatangi tanaben shilangtsü takoktsü lir, anungji ken metsü metenshiti arung ta ayongzüker.

Amen.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## British Columbia, Canada nung Tenla ki ana rongdok



June 21, 2021 anepdang British Columbia kübok Penticton anasa Sacred Heart Arogo Tenla ki rongdoker aliba noksa nung angur.

**Oliver (British Columbia), June 22, 2021 (Agencies):** British Columbia nung Roman Catholic pur Tenla ki ana rongdokogo, ta June 21 nü Canada national police-i metetdaksü.

Royal Canadian Mounted Police-i ashiba agi, Hombarnep yakta police kati Penticton Indian Band reserve nung aliba Sacred Heart Arogo Tenla kidang mi adoka angu, iba sülen police iba tesemji tonga aodangbo Tenla kidang mi tulu adoka liasü.

Ghonda ana majungdang Osoyoos Indian Band reserve nung aliba St. Gregory Arogo Tenla ki arongba osang Royal Canadian Mounted Police nem metetdakja liasü.

Osangbener den jembidang Penticton Indian Band nung tongti, Greg Gabriel-i, Sacred

Heart Arogo Tenla kidang kiyimba sentongtem aser asüpila sentongtem agia aruogo, saka Roman Catholic Arogoi tanurtem mejungi anishiba residential school tem ketdangsuba agi nübür aikati Arogo dang mepelai liasü, ta metetdaksü.

Tenla ki ana rongdokbaji nisung kar mapa asütsüa akok, ta melung meleme police-i Penticton aser Osoyoos Indian Bands den senteper bushisüngdang tenzükogo.

Tenla ki anaprong meshi-meshia rongdokogo, ta RCMP-i metetdaksü.

"Nisung kari Tenla kidang mi senoktsü asütsüa akok ta bushisüngdangertemi melung malemer. RCMP-i lenla ajak nungi bushisüngdangtsü aser kuli metetdaksütsü," ta Sgt. Jason Bayda-i sangdong ka

ajanga metetdaksü.

Tawa Tk'émlops te Secwepemc Nation-i sangdong ka ajanga, taoba mapang Kamloops Indian Residential School aliba tesem nungji küm aika jakdang tanur 215 tasümgang rema aliba tawa ngutetogo, ta metetdaksü.

Residential School ya 1890 nungi 1969 tsüngda lapoka liasü. Iba mapang nungji federal sorkari Catholic Arogo dang nungi iba school meshizüka ketdangsuba sülen 1978 küm shibanga liasü.

Aso 19buba mapang nungi tenzükaga 1970s tashi nung Canada nung First Nations tanur 150,000 shi kangshia linüki yariba Khristan school tem nung züngdaksü. Iba mapang nungji school tem nung tanurtem dak tim mesüi beshiba tatalokba aika liasü.

## Iran Tir tasenba, Ebrahim Raisi kübok reshikangshi kanga bulutsü

**June 22, 2021:** Taoba mapang Iran nung Judiciary tongti, Ebrahim Raisi-i 2021 Tir election nung takok nguogo; iba election nung ochimashi kanga liasü aser voters shilem ishikati dang vote agütsü, ta International Christian Concern-i metetdaksü.

Iran nung Supreme Leader Ayatollah Khomeini teyari ajanga Raisi-i Tir election nung takok angu, kechiyong Ayatollah'er jurisdiction nung Raisi den atongtepa tokteptsüpur candidates ajak disqualify sütsü.

Iran nung democracy inakyim nung Raisi-i takok angu saka pa yimsüsüba kübok linük nung meimchir temeden balala anema inyaksü aser US den tesendaktep ano tamajungba akümtsü, ta aikati bilemer.

Raisi Tir akümba sülen anogo ishika tsüngda United States dang taoba Tir Donald

Trump yimsüsüba mapang Iran anema benokba r o n g s e n k e t t s ü n g tenokdangbatem agienang aser Iran nuclear tezüngzüktepa agienang ta akhanger, ajisüaka pai US Tir Biden ajurutsü maongka angu nunga pai majurutsü, ta shiogo.

United States-i rongsenkettsüng tsütsü tenokdangba benoka lia Iran Tir election nung mezüng takok angusangji Raisi asütsü.

1988 küm judicial death commission kübok Raisi teyari ajanga minute ishika tsüngda Iran nung 30,000 nem tasüba temerenshi obendang agütsü.

Judiciary tongti ka ama Raisi kübok Iran nung 620 nem tasüba temerenshi agütsüogo, aser parnok timbaka Khristan densema minority teloktem nungi lir.

Talisa Raisi-i Islam yimsü nungi Khristan yimsü dangi

meyipertem kanga reshikangshiogo aser ano maneni reshikangshitsü.

2021 küm United States Commission on International Religious Freedom (USCIRF)-i Iran linük ya Country of Particular Concern (CPC) nung züngokang ta benokogo.

Amnesty International aser Human Rights Watch nati, Ebrahim Raisi-i election nung takok anguba ya Iran nung meimchirtem temeden atema amokmeren ka asütsü, ta shia 1988 küm yimtenren dak sendakba nung tepuokdak alir aika tepsetba nung Raisi-i shilem agia aliba bushisüngdangtsüla, ta takhangba agütsüogo.

Amnesty Secretary-General Agnès Callamard, "Ebrahim Raisi-i meimchir temeden alema inyakba atema pa anema bushisüngdangtsüla, ajisüaka pa Tir ang shimogo," ta ashi.

## ANOGO ABEN TSÜNGREM DEN

## Tekolak ka dang nungi ana tajungba

*Ka dang nungi ana tajungba kechiaser parnoki inyakba asoshi taa tajung lir. Sayutsüngir 4:9*

Alima nung mapang ajak nung shisatakatiba Solomoni ibai zülu. Pa chuba tajung ka, Tsüngrem shisatsü agi sünga liasü aser bendangtsür pa kinüngtsütem asütsü agir külen pai ochi Tsüngrem toktsür tangar Tsüngremtem sülen anidak. Taküm tatem len Israel Tsüngrem nungi pilar pei sasa jangratem lemgang bushiba amajok ta pai zülu. Pai meimchir shisatsü amajok mesüra tamachi, meimchir kisüngi merangba aser takok amajok ta zülu. Pai meimchir tashi, merumeru, bendenba aser yimsü amajok ta jembü. Item ajakji mopung sülen arishiba ama lir. Saka item jembüba tiyong nung Solomoni kijai mesüi yaritepba inyakba koda tongtipang iba indang jembü. "Ka dang nungi ana tajungba kechiaser parnok mapa asoshi taa tajung angutsü."

Takümji lokti kümteta alitsü asoshi yanglu. Eden Tsüki nung Eva matsüngdang ibai angatet. Taküm sendaktepa alitsü yanglu, kija alitsü atema masü. Kari pei mulungba nung dang aotsü bilemer, pei mulungba dang inyaksü bilemer. Saka atangji tekolak ka dang nungi ana tajungba lir. Ibai satiba nung dang masü, saka shishilembaba aser arogo nunga shidak lir. Ka mapa kar nung tebilemba tajung alitsü akok, saka tanga ka nungbo kecha memetetti alitsü akok. Anaji kati ka yaritsü akok. Tashi taitangi tashi maitsang yaritsü akok, ano iba dang nungi tajungba, "Lisü asem mesentepbabo yakta metokdangtsü" (t.12). Tembar ayimba nung, satiba, shishilembaba tesendaktep, yamala, nung Tanela Temeshi den sendaktepba lira tashi itta alitsü. Asen Teyangluri asenok sendaktepba alitsü yanglu ta bilemtettang.

Kibuba, kü taküm nung tabensa tesendaktep aliba asoshi Ne tenüng asanger. Adianu dang nungi Na kü den anasaba lir. Amen.

## Nagaland Baptist Church Council-i vaccine indang jangjashitsür

**June 22, 2021:** Coronavirus vaccine aser Khristan tamang dak sendakba nung Nagaland tesem balala nung nisung aikati coronavirus vaccine agitsü arendakba mapang nung Nagaland Baptist Church Council (NBCC)-i sangdong ka ajanga, medical fraternity nungi ang vaccine indang tajungtiba angatetsü, ta metetdaksü. NBCC-i, coronavirus vaccine ya scientist tem aser research agirtemi kanga meranga inyakba den külemi meimchirtem atema research technologies amshiba ajanga yanglutetba lir, ta metetdaksü.

June 18, 2021 nü NBCC-i video conferencing ajanga Coronavirus wara mapang nung Associations aser Arogotem teinyaksü shilem onük nung o lemtepa liasü.

NBCC-i nübür ajak dang, nisungtem melungjang nung tetsübu lidaktsütsüsa Laishiba tai meratetsüla, ta mepishia metetdaksü.

NBCC-i "Vaccination aser nija tekümtet, vaccination aser Khrista yimli, mesüra vaccination aser Khristan tamangji meputep, ta nisung kari jembir. State tesem kar nung vaccine agitsü atema aikati arendaker," ta metetdaksü.

Kanga meranga inyakeremi yanglutetba vaccine agitsü arendaktsüji tim masü, kechiyong vaccine ajanga virus anema mapa inyakba kuli aika ngudar, ta NBCC-i metetdaksü.

Nagaland Baptist Church Council-i, "Tang ama tensa ka nung asenoki asen meküta tatalokbatem ajak asadangtsüla. Asenok dang taochi sayuang aser timtem mapang nung tangar tenzüktsü atema asenok kümzükang, ta asenoki Tsüngrem dang maneni sarasademtsüla," ta ayongzüik.

NBCC-i, "Vaccine agitsü mesüra magitsüji pei melung. Ajisüaka tim ketdangsertemi nübürtem dang iba wara mapang nung asenok dang masü saka tangar-a kümzüktsü atema maneni ajungshia arudar," ta metetdaksü.

NBCC-i nübür ajak dang kanga shisa kaa telemteba agitsüla aser ajak ajungtsü atema inyaksüla, ta mepishia metetdaksü.

"Ajaki amalitepa inyaksüla aser tang ama tensa mapang nung teimla aser tesünep agütsür kaka asütsüla. Tarutsü nunga tang ama wara aika ajangshitsü," ta NBCC-isa metetdaksü.


**OLONG PAITEP # 5853**

1		2		3		4	5			
				6						7
		8								
9				10		11				
			12					13		
						14				
16						17				

<b>TIPILEN</b>		<b>LANGTSÜNGLEN</b>	
1. Nisung jenti - (5)		1. Tenük telong - (9)	
4. Tsük rudenba - (5)		2. Committee dang ajar - (5)	
6. Temzüng tesashi - (5)		3. Yagi ki okdoker - (7)	
8. S_ _ _ i - (3)		5. Yim lenmang - (5)	
9. Nisung rongnung telemsa - (3)		7. Temoatsü keter meyipa aruba - (9)	
10. Anogoshi - (4)		11. Kanga junga menemba - (7)	
12. Ajanga aor - (4)		12. Kenyongi majinü - (5)	
13. Tsük rizüngdak - (3)		13. Rong kanga tulu - (5)	
14. Tebang nungi adokba - (3)			
16. Süngdong tatembangtiba - (5)			
17. Meputep - (5)			

**OLONG PAITEP # 5852 TELANGZÜBA**

<b>TIPILEN :</b>		<b>LANGTSÜNGLEN :</b>	
1. Tanga, 6. Wara, 7. Rajang,		2. Anga, 3. Yabang, 4. Tarok, 5. Orak,	
9. Anük, 10. Jenjang, 11. Alar,		8. Ainer, 9. Anema, 10. Jabili,	
14. Ngashi, 15. Nala, 16. Mechi.		11. Among, 12. Miim, 13. Anem.	



**TETI TANGAR DANG MESHI-TSÜYATSÜ YIMYA SUPABA**

**Watsüla** : Hai Narola...Nabo asen kidanger Uncle Alokba'er dangi orr tang lon nung enoktsü Bengana ka-ana... Mersü pezü-pungo-ka...Ngashi ana-ase-ka ta.... meshia bener arungjo.... Hang yakta orr meshia bener arungjo.

**Narola** : Uncle....Ozü Amma-lai lon nung enoktsü Bengana ka-ana.... Mersu pezü-pungo-ka aser Ngashi ana-ase-ka lira....agujang ta ashi-a nooo...???

**Alokba** : Hai Narola.... Lon nungji Metsü-a tilakabo enoktsü asüja-do...???. Anungji amma-la dang ano Metsü-a tila-ka koda...???. ta tang orr asüngdang arungjo. Eeesssh...Arok kulem itasen tila asüyongjia achir...saka teti tangar dang teka ladaker aji tera-ka koangjo...aji tila-ka koangjo...ta dang alitsüba yabo kanga majunga...!!!!

**Lilir : L.Kika Pongener.**

**TANÜBO NAI LANGZÜANG**

Q. Namami Gange project kodang tenzük?  
 A.2010      B.2014      C.2016      D.2018

===== (Taruba adok nung onoki langzüsü)

**YASHI ADOK TELANGZÜBA : LIC Card Services**

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Kar**  
 (n) yinjang nung am ama yanglur enoka yangluba (gun powder)  
 \* Konyak aser Phom nungertemi **kar** yanglur.

**Kar**  
 (n) Etsük aon nung tasen katitsü atema amshiba aut. Ibai along, lozü aser nangka süngküp arongba aut. (ash used to neutralize acid (sour) in bamboo shoot curry.  
 It is made out of burnt of gooseberry type fruit tree bark.)

**NAI-A YA METETTER MA?**

**INDIA NUNG NÜBURTEMI SAPUA ALIBA TWO WHEELER**

**MODEL KAR: 'MAY 2021'**

OEM	Model	'May '21 Sales'
- Hero	Splendor	84,043
- Hero	HF Deluxe	42,118
- Bajaj	'Pulsar 125'	- 28,636
- TVS	'Apache series'	19,885
- Honda	Activa	17,006
- Hero	Super Splendor	16,392
- Honda	Shine	14,666
- Bajaj	Platina	11,164
- Suzuki	'Access 125'	- 9706
- Royal Enfield	'Classic 350'	- 9239
- Bajaj	'Pulsar 150'	- 8638
- Bajaj	'CT 100'	- 7678
- Hero	Glamour	7313
- TVS	'XL 100'	- 7135
- TVS	Sport	6905
- TVS	Jupiter	6153
- Hero	Passion Pro	5041
- Royal Enfield	'Bullet 350'	- 4557
- TVS	NTorq	4337
- Royal Enfield	'Meteor 350'	- 3375
- TVS	Radeon	3058
- Yamaha	FZ	3008
- Suzuki	Burgman Street	2745
- TVS	Start City+	2451
- Hero	Pleasure+	2208

**\*\* (OEM - Original Equipment Manufacturer)**

**SUDOKU # 5894**

**TELANGZUBA # 5893**

		9	6	7				5	9	7	3	2	6	4	1	8
2			3	8				4	8	2	1	5	7	3	9	6
	7		2	9		5	4	3	1	6	9	8	4	2	7	5
		1	9	5	8	3		7	2	3	5	1	9	8	6	4
	3		4	6		1	2	6	4	9	7	3	8	5	2	1
	9		3	1	5	4		8	5	1	6	4	2	9	3	7
7		4		9	2	3		9	7	8	2	6	5	1	4	3
	2	3			6	1		2	3	4	8	7	1	6	5	9
	1			7				1	6	5	4	9	3	7	8	2

**OJANG LUTEP # 5438**

NGTAARI :

LEBIMBA :

ARMAPEN :

JUNTAGBA :

YONASÜGA :

IPE :

BEMILBA :

NGDA :

AKDINYOKER :

IRAL :

**OJANG LUTEP TELANGZÜBA # 5437**

**TAJUNG TAMAJUNG KECHA MESHISADANGI INYAKDANG**  
**AIBEN TAKOKSA ANGÜTSÜSA TENSA AJURUR**

**TAN HOPTA ATEMA - KOMA SÜLA ?**

**Q. Food & Civil Supply department nungi Relief jang ya magütsü anen nunga koma süla ?**



7th Pay Commission recommendation benoktsü khanga longkak aitba mapang Mumbai nung JJ Hospital nurse temi yimyim ayimba noksa nung angur.

### India nung nisung 22 dak Covid-19 Delta Plus variant potetogo

**New Delhi, Aami/June 22 (Agencies):** India nung nisung 22 dak coronavirus Delta plus variant potetogo, ta centre sorkari Mongolbarnü metetdaksü. Delta plus koba Delta (B.1.617.2) variant mutata asüba ajanga adokba lir, iba variant dak lendong keta lir, ta tang tashi nungbo Union health ministry-i sangdonga mali, ta health secretary Rajesh Bhushan-i ashi.

India nung Delta plus variant poteter 22 rongnung nisung 16 Maharashtra kübok Ratnagiri aser Jalgaon nung potetogo aser Kerala aser Madhya Pradesh, Bhushan nung kar dak potetogo. Paisa, Delta plus variant ya India dak alia US, UK, Portugal, Switzerland, Japan, Poland, Nepal, China aser Russia nunga poteta lir.

Covid tensa dak sendakba nung sorkari, tensa tajungba küma odar saka nüburtemi Covid-19 dak sendakba yimyayimpong shidak benshitsu nungdaker ta shiogo. May 7 nü nisung timba dak tashidak potetba sülen tang India nung anogoshi Covid-19 tashidak poteter shilem 90 shi agi tajemba kümogo, ta kasa sangdong ajanga metetdaksü.

Linük nung taoba ghonda 24 tsünda nisung 50,000 majung dak tashidak poteta tashidak menar ajak senteper 29,977,861 jungogo aser kasa mapang nung anogo 79 sülen tang mezüngbuba tashidak menar temang anepalua alirtem 700,000 tekübok kümogo, ta Union health ministry data ajanga Mongolbarnü sayuogo. Mongolbarnü nisung 42,640 dak

Covid potetba metetdaksüogo aser nisung 1167 asüba sülen asür 3,89,302 jungogo.

NITI Aayog VK Paul, shiba conference nung shilem agia liasü pai, India nung June 21 nü nisung million 8.8 nem Covid-19 vaccine agüja alizüng tasen ka tongtetogo, ta ashi. Vaccine ya shilem 64 bo yimdak yimtsüngtem nung agüja liasü, ta Paul-i ashi.

Vaccine dose shilem 36.32 yimti aser jila balala nung aser shilem 63.68 yimdak yimtsüng nung agüja liasü, ta pai ashi. June 21 nü Madhya Pradesh nung vaccine timba agütsüogo aser parnok sülen Karnataka, Uttar Pradesh, Bihar, Haryana, Gujarat, Rajasthan, Tamil Nadu, Maharashtra aser Assam nunga vaccine tolongjunga agüja liasü, ta Paul-isa shisem.

### Defence Ministry-i Pollution Control rong ana alitsü

**New Delhi, Aami/June 22 (Agencies):** Indian Coast Guard atema sen crore 583 intoka pollution control rong ana yanglutsü atema Goa Shipyard Ltd (GSL) den Mongolbarnü Defence Ministry-i tenangzüktepba ka yangluogo, ta ketdangsürtemi ashi.

Rong ana ya tziyim nung totzü ishiba amala tatalokba azüoktsü aser force indang pollution response mechanism ajungketa, Indian Coast Guard (ICG) inyakyim tajungba kümdaktsütsü nükjidong nung alizüker.

Rong ana ya ka 2024 küm November ita aser ka 2025 küm May ita renemer agütsütsü. Defence ministry-i ashiba agi,

rong ana ya GSL-i design süa yanglutsü.

"Iba rong ana alizükba ajanga tziyim nung totzü ishiba azüoktsü atema ICG inyakyim tajungba kümdaktsütsü," ta ministry-isa ashi. Tang ICG ket nung pollution control vessels (PCVs) asem Mumbai, Visakhapatnam aser Porbander nung amenoka lir. Item rongtem yagi India indang economic zone aser linük temeket nung aliba asetkongtem meketa tziyim nung totzü inshiba amala lendong azüokba den tzi menenba asadanga tapet jenjang agir.

"PCV tasen ana alitsü sentong yanglur aliba ya linük anüdoklen aser Andaman and Nicobar asetkong temeket

atema lir," ta kasa sangdong ajanga ministry-i metetdaksü. "Helicopter dena anentetsüsa yanglutsü aliba rong nung tziyim nung totzü inshiba azüoktsü, recover asütsü aser asemshia yoktsü atema modern pollution response equipment densema advanced features aika keta yanglutsü," ta ministry-isa metetdaksü.

Ministry-isa, iba tenangzüktepba yangluba ajanga indigenous shipbuilding capability ajungkettsü aser shipbuilding sector, kong 200 MSME (micro, small and medium enterprises) vendors sendaka lir, item nem mapa tali bendenloktsü atema maongka agütsütsü, ta ashi.



TMC lenir Yashwant Sinha den tanga Rashtriya Manch lenritem NCP tir Sharad Pawar' er kidang senden amenba sülen tangokba noksa nung angur.

## Sonia Gandhi-i June 24 nü party GS & In-charges senden ayonger

Stalin-i Centre indang ports bill anema nokdaksü CM 9 ayongzük

New Delhi, Aami/June 22 (Agencies): Tamil Nadu chief minister MK Stalin-i Mongolbarnü chief minister teku dang, tziüküm nung aliba state aser Union territories temi Indian Ports Bill, 2021 tasenba anema nokdaksü ayongzükogo. Stalin-i Gujarat, Goa, Maharashtra, Karnataka, Kerala, Andhra Pradesh, Odisha, West Bengal aser Puducherry Union Territory chief minister tem dang iba bill anema nokdaksü ayongzükoga shiti züluogo.

Stalin-i, iba bill ajanga minor port tem achaayangba nung tetsükdaksü adoktsü aser port tem achaayangba aser aziökba dak sendakba nung state sorkar tashi tajemba akümtsü, ta ashi. Tamil Nadu chief minister-isa, tang benoka aliba inyakyimtem

kübok port tem kanga junga renloka aoba ajangshia arudar, ta ashi.

"Maneni tang state sorkari benoka inyaksangshia aliba tashi Union sorkari agiadoktsü. Anungji tziüküm nung aliba state aser Union territories temi Indian Ports Bill 2021 anema nokdaksü ayongzükoger aser state nem agüja aliba tashi mezübelang mesüdaktsütsü atema longjemer jenjang agitsüla," ta Stalin-i shiti nung ashi.

"Tang benoka aliba inyakyim ajanga state kübok minor port tem kanga junga renloka aoeer ta nenokia agizüktsü. Centre sorkari Bill tasen benoktsü atema inyaksangshiba ajanga minor port tem achaayangba nung tetsükdaksü adoktsü, kechiyong Bill agizükra state sorkari shilem tulu ka magitettsü.

(Maneni tapak 9 nung...)



BJP lenir Vijay Goel aser ex-mayor Jai Prakash den party züngsemtemi Bara Tooti Chowk, Sadar Bazar, New Delhi nung tzi temenen agütsüba atema Delhi sorkar anema longkak aitba noksa nung angur.

## Modi-i ayongba senden nung Gupkar alliance-i shilem agitsü

**New Delhi, Aami/June 22 (Agencies):** Jammu & Kashmir nung taoba küm tentetba alliance-i Mongolbarnü sangdong ka ajanga, Ato Kilonser Narendra Modi-i Brehostibarnü party ajak senden ka amentsü ayonger aliba nung shilem agitsü, ta shiogo.

"Tejaokertem ajak New Delhi nung senden nung shilem agitsü," ta National Conference (NC) tekolakba Farooq Abdullah-i, Srinagar nung alliance senden ka amenba sülen ashi.

Abdullah lenisüba nung People's Alliance for Gupkar Declaration (PAGD) senden ka par kidang mena liasü. PAGD nung züngoksema aliba NC aser Mehbooba Mufti-i aniba People's Democratic Party nata pei sasep nung senden menogo, aser iba ken o dak sendakba nung telemtetba agitsü party tekolak nem nongloktsüogo.

Abdullah-i ashiba agi, alliance tamendakdak tejangja aser nüburtemia jangjaa lir. Paisa, New Delhi nung senden

amenba mapang parnok Modi nem parnok taginüba metetdaksütsü, ta ashi. "Onoki lenla ajak ayimjema sensak asemtsü kechiyong party ajak senden nung sensak asemtsü atema onük tejangja ka lateta mali," ta Abdullah-i ashi.

Kasa mapang nung Mufti-i, sensaksem asoshi parnok renema liasü, ta ashi. "Alliance senden amenba sülen senden nung shilem agitsü jaokertem ajaki oa adentsü telemtetba agi," ta Mufti-i ashi.

Mufti-isa, sensaksem kanga junga katettsü atema sorkari yimden yimsüsüba tsütsü tepuokertem ajak chiocksüla, ta ashi. "Tepuokertem aika tepuokdak lir. Anungji yimden yimsüsüba tsütsü tepuokertem chiocksüla aser Kashmir adena orr tepuokda yua alirtem anir arutsüla," ta Mufti-i ashi.

Party ajak senden nung shilem agitsü atema Modi-i lenir 14 jaokogo, koba Jammu & Kashmir nungi state jenjang aginba sülen Centre den mezüngbuba senden asütsü.

# N Korea-i WHO dang Covid-19 agi shiranger ka danga mali ta ashi

**Seoul, Aami/June 22 (Agencies):** North Korea-i World Health Organisation dang, parnoki June 10 nü tashi nung nisung 30,000 dak coronavirus tashidak tendangogo, ajisiüaka nisung ka dak danga tashidak meputet, ta shiogo.

WHO-i Mongolbarnü sangdong ka ajanga ashiba agi, North Korea nung tashidak tendangertem rongnung June 4 nungi 10 tsungda nisung 733 dak tashidak tendangba densema lir. Item nisungtem rongnung nisung 149 dak influenza mesükba tashidak mesera severe respiratory infections keta liasü.

North Korea-i par linük nung nisung ka dak danga tashidak poteta mali ta ashiba ya mongintemi temulung malemer, kechiyong iba linük nung health infrastructure

# Myanmar mitkar anemba sepaitemi yimti tulu ka

**Mandalay, Aami/June 22 (Agencies):** Myanmar nung yimti tulutiba jenjang tanabuba nung aliba, Mandalay nung Mongulbarnü Myanmar security forces tem armored vehicle teyari agia tawa tentetba militia (sepai saka sorkar meyong masü) telok ka den rara aser yangji nisung ana asü, ta iba telok nung züngsemtem aser osang balala ajanga ashi.

February 1 nü mitkartemi sorkar tashi rakzüka Aung San Suu Kyi'er sorkar atsüngdokba sülen mitkartemi yimsü asüba anema longkak aitertem security forces temi nokdanga arur. Iba yongji mitkar tashi amshia sorkar atsüngdokba maparen anemba telok, koba dang People's Defense Force ta ajar, parnok ya Myanmar tesem balala nung tentetogo.

Tang tashi nok-o-nü terara bener raraba militia tem ya jila tila aser yimdak-yimtsüngtem nung dang lir, saka Mandalay indang People's Defence Force tasenbai ashiba agi, mitkartemi parnok amenoka aliba tesemtem amakba sülen parnokia telangzüba agütsü.

"Rara tenzükogo. Yangi ano maneni raratsü," ta iba telok nung züngsem, Capt. Tun Tauk Naing-i telephone ajanga ashi.

Iba tesem nung alir kati video tangokba nunga prangbong ola angashia liasü.

Sepai 20 shi arua iba telok aliba tesem mita bushiba ajanga mitkartem den khatap, shirnoki injang aser bomb agi raksatsü makokba gari asem yoka liasü, ta Myanmar Now ajanga ashi.

Iba militia telok nungi ketdangsür kati Mizzima news portal dang ashiba agi, par

kanga majung aser China den arrtsü junga nokdanga mali.

Tashidak anema jenjang agiba ya linük liyonga aotsü ken o ka ta shia North-i, alima penzürtem nokdangba den diplomats tem meyipa yokogo aser arrtsü adena senzösenpong aser shishilembaba dak sendakba nung tenokdangba tesashi agütsüogo. Pei sasa linük mokdanga ayuba ajanga rongsenketsüng mejungi aliba ano tamajungba kümshiogo.

North Korean lenir Kim Jong Un-i taoba hopta senden ka nung ketdangsürtemi dang COVID-19 dak sendakba nung tenokdangba agütsür alibatem atsülagshitsü atema renema alitsü shiogo, aser iba ajanga linük tangsa tangbo lapoktsü asoshi kecha sentong mali ta angateter.

züngsem trok puogo aser sepai ana tepsetogo.

Mitkar atema odongtar nungi telangzüba kecha agüja mali.

Mitkar meyong Myawaddy Television (MWD) ajanga par indang Telegram message channel nung ashiba agi, security forces temi ki ka mita bushi aser "armed terrorists" temi prangbong aser bomb tila amer rara nokdak.

Iba mapang "kiralongrar" pezü tepset aser ti apu aser security forces kar kanga sashia yiru, ta ashi.

Myanmar nung mitkar yimsüsürtemi parnok anema tentetba National Unity Government dang kiralongrar telok, ta tenüng agüja lir, aser bomb poklokja ki-o-jen raksatsüba aser nisung tepsetba asoshi parnok tenüng asener.

Taoba mapanga Myanmar tesem balala nung militia teloki sepai dak amakba sülen mitkartemi artillery aser tayimtsü amshia amak, kong telok anatsülen nisung asü aser nisung meyirijang aika pei ki yutsür tesem balalai jena ao.

Hokulbarnü United Nations General Assembly ajanga Myanmar dangi nok-o-nü yokba anentsü ayongzük aser mitkartem dang November election akhumtsüba Suu Kyi densema yimten yimsüsür pua aliba chiochtsü ajungshi.

Honibarnü Myanmar indang Foreign Ministry ajanga sangdong ka nung UN temzüng magizüker, ta ashi.

Mitkartemi sorkar atsüngdokba sülen longkak aiter tajemba agi 873 tepsetogo, ta Assistance Association for Political Prisoners activist group ajanga ashir.

# Philippines Tir Duterte-i COVID-19 vaccine maginertem amokmeren



**Manila, Aami/June 22 (Agencies):** Philippines tir Rodrigo Duterte-i, coronavirus tashidak nungi jenboa alitsü atema vaccine agitsü memulungertem tepuokdaki yoktsü amokmerenogo. Asia nung linüktem rongnung Philippines-a wara agi kanga mejungi kongshir lir aser tang tashi nung nisung million 1.3 tema dak tashidak potetogo aser nisung 23,000 süogo.

"Vaccine shimang, ajita mesera ni na tepuokdaki yoktsü," ta Duterte-i ashi. Linük yimtiba Manila nung vaccine agütsüba tesemtemi nisung kanga ajema aruba osang angazükba sülen pai nüburtem amokmerena liasü.

Duterte indang olen aser

health ketdangsürtem olen meputeper, shirnoki COVID-19 vaccine agitsü ajungshir, ajisiüaka vaccine ya pei mulungka nung agitsüla ta ashir. "Ni mashiyimi tangatet, linük mepetmesü tulu nung lir. Sorkar inyakyim pu-masemba atema ni Philippines nunger dang tezü adanger dang," ta Duterte-i ashi.

June 20 nü tashi nung Philippine nung ketdangsürtemi nisung million 2.1 nem vaccine agütsüogo, koba nütsünyongsük million 110 aliba nungi taküm million 70 nem vaccine agütsütsü atema sorkar sentong aliba den meputep.

Kasa mapang nung wara azüoktsü atema Duterte-i inyakyim tesashi benokba atema

pa aija arudar aser school melapokshitsü atema pai nokdakba nungi masetshi lir.

International Criminal Court prosecutor kati court dang Philippines nung tesemepba mozü den raraba mapa nisung tepsetba ken o bushitsüngdangtsü atema temelaba meshiba atema pai ICC aitsüogo.

Duterte, shibai 2018 küm March ita Philippines ICC indang founding treaty nungi atsüngindaktsü, pai iba ken o bushitsüngdang nung teka amteper minyaksü ta shia arudar aser ICC ya tagidak mali ta shiogo.

"Ni kechiba okadak ken o benoka aliba anema nokdaktsü mesera temesüng nisungtemi aitsüba ken o nung nokdaktsü. Na tekelok meshidak asütsü," ta Duterte-i ashi, shibai 2016 küm tir election akokba sülen temesepba mozü anema campaign ka tenzük, kong nisung aika tepsetogo.

Human rights teloktemi ashiba agi, ketdangsertemi temulung malemba nisungtem tepset, ajisiüaka Duterte-i, ketdangsürtemi tepsetertem ya parnok aputsü atema apusoba anema nokdakertem lir, ta ashi.

# Afghanistan nungi US sepai meilongi anizüker aotsü akok

**Washington, Aami/June 22 (Agencies):** Tawa tongpang kar nung Taliban teloki takok anguba mechi Afghanistan nungi US sepaitem anizüker aoba maparen meilongi kumdaktsütsü akok.

September 11 tashinung anizüker arumatsü lemtetba tang tashi lir saka yimya melenshitsü akok, ta Pentagon odongtar John Kirby-i ashi.

Taoba hopta Pentagon ketdangsürtemi sepai anizüker aruba maparen tasadang ka temogo, ta shia liasü.

US aser NATO ajanga par sepai anünga aliba anizüker

arutsü renemba mapang Afghanistan nung azüdokshi tali akumer.

Taoba ita Taliban teloki amakba maparen tali kumogo aser district 30 dak tema par küboki airdaktsüogo. Islam yimsü kanga metsünga-reta amshiba telok yagi mitkar meyong hadir aika rakzükogo, sepai aika tepset, yirutsü mesüra apu, ta yangji aliba osangtemi ashir.

Afghan sorkar indang odongtar temibo district tem ya Taliban küboki mait aser parnok ya "tactical withdrawal" nung azüngtsü, ta ashi. Taliban züngsem kwi tepset mesüra yirua aliar mejangja.

Linük north tsütsü aliba Kunduz province ajunga parnok kübok lir, aser provincial yimtiba kisüng sorkar ket nung lir, ta Taliban-i ashir.

Iba telok yagi kanga tongtipang yimti, Kunduz (Kunduz province yimtiba) ya lungbanga lir, ta police temi ashi. Mapang talangka nungi tenük yoka aruba yimti ya 2015 küm mapang tatsüka telungpur kabui ai aser ano NATO-i yariba sorkar meyong sepaitemi tanaben agia liasü.

(Maneni tapak 9 nung...)



Parliamentary election nung takok anguba sülen khen atema Ato Kilonser inyaka alisang, Nikol Pashinyan busemeretem Yerevan, Armenia nung rally ka nung adenba noksa nung angur. Azerbaijan den yimjung tezüngzüktep agiba mechi nüburtem jashiba anendaktsütsü atema Ato Kilonser Nikol Pashinyan-i election ya ayongzüka liasü, aser iba election nung par Civil Contract party ajanga vote shilem 53.9 nguteta liasü.



## DEF Longleng nung vaccination drive takok ngua agiogo



Longleng, Aami/June 22, 2021: Superintendent of Police, Longleng indang office complex nung, Mongolbarnü police aser parnok kibong tem atema Vaccination Drive sentong ayonga agiba mapang, Sr. SP, Longleng, Yanithung Ezung, CMO, Longleng, Dr. Obangjungla aser ketdangsurtem den tajangzük angutsüpur tem külemi tangokba noksa ka yangi angur.

**Longleng, Aami/June 22, 2021 (TYO):** Police aser parnok kibongtem atema, Mongolbarnü (22.06.2021) Superintendent of Police, Longleng indang office complex nung Covid-19 Vaccination Drive sentong agiba den, DEF Longleng-i, police aser parnok kibong ajunga nem Covid-19 vaccine indang mezüing dose takok ngua agütsüba osang sangoktsü. Kasa drive mapang, police nübu timbaka nem Covid-19 vaccine tanabuba dose agütsüogo, ta sangdong ka ajanga metetdaksü.

Iba vaccination campaign nung, District Immunization Officer, Longleng, Dr. Imnameren Phom-i, yakpang ser inyakertem (frontline workers) rongnung police dena lir astünung, police force nem vaccine agütsütsü tongtibang kümogo. Parnok duty nung inyakba mapang, teti dang kima yimdong nung tensa asadanga senzütsüsa akümer aser parnoki memeteti menar aruba tashidak ya par kibong aser parnok aliba tesem nung prokshitsü ana nung dang lir, ta metetdaksü.

Ajiasünung, iba virus prokba azüoktsü aser iba den külemi frontline workers tem kümzüka yutsütsü nükjidong nung, SP, Longleng teyari ajanga police wadang nung inyakertem aser parnok kibongtem atema iba vaccination drive sentong agia liasü, ta pai shisem.

Vaccine agiba ajanga iba wara menaba lendongbang aser tashidak ajanga asüba nungi kümzüka yutsür ta metetdakja, DIO-i, Covid-19 agi asür shilem 94 tashi vaccine magirtem lir, ta ashi; aser vaccine agiba ajanga nisungba ji dang masü saka iba wara inzü raksatsüba ajanga par kibong aser lokti kümzüka yutsütsü, ta pai shisem.

Dr. Imnameren-i, Covid-19 tasembenbuba wave ya mapang mashi ka nung adoktsü akok aser iba wara ya tanurtem atema kanga dang lendong asütsü, ta tekümdangtsü agütsü.

Anüngji, mozüki nung tanurtem atema akok tashi nüngdakba tekümdangtsü meratem agitsü asoshi medical team-i maparen achaayangdar aser iba den külemi, tasembuba wave marudang, tanurtem iba wara lendongbang nungi

kümzüka ayutsü asoshi tsürabur aser tain rogu ajak nem vaccine agujadoktsü asoshi maparen inyakdaki, ta pai ashi.

Senior Superintendent of Police, Longleng, Yanithung Ezung-i, Medical Department ajanga agütsüba maongka ya pelashishia agizütsü asoshi police aser parnok kibong tem ajungshia liasü. Police Force atema bilemja iba Vaccination Drive takok ngua achaayangba asoshi pai Medical Department dang pelaba metetdaksü.

Maneni, kasa sentong nung, CMO Longleng, Dr. Obangjungla-i, Covid-19 vaccine tanabuba dose agir sülen ang iba wara nungi kümzüka litettsü aser tajangzük angutsüpur temi ita asem sülen tanabuba dose agidaoktsüla, ta ashi. Laisa, vaccine agiba sülen, Covid-19 dak sendakba tongtibang meratem talisa mask inoktsü, teka metsütsü aser lokti nungi pilar alitsü tetuyubatem nung teti anidaktsü asoshi ajak ayongzüka liasü.

Iba sentong nung SDPO, Longleng, Impung Chang menden liasü.

## Sonia Gandhi-i June 24 nü party... (Tapak 7 nungi...)

Tzüküm nung aliba state ajaki Indian Ports Bill 2021 anemba lemsatepsüla aser state nem agüja aliba tashi mezübelang mesüdaksütsü atema longjemer jenjang agitsüla," ta pai ashi.

Union ministry of ports, shipping & waterways-i, minor port tem achaayangba model yanglushitsü atema bill ka benokogo. Iba bill ajanga minor

port tem atema sentong yanglutsü, inyakyim achaayangtsü, terenlok atema inyaktsü aser azüoktsü atema MSDC nem tashi agütsütsü asoshi benokdangogo, koba Indian Ports Act, 1908 kübok state sorkar nem tashi agüja lir. MSDC ya tang tashi nungbo advisory body ama dang inyaksangshia arudar, saka bill agizükra parnoki minor port tem

## Afghanistan nungi US sepai meilongi... (Tapak 8 nungi...)

North-east tsütsü Takhar province nunga Taliban teloki Deobarnü district ana agitsü merang, saka Afghan security forces temi nokdangtet.

"Taliban-i maneni district centre tem maka azüdokshiba ya onsara lir, anungji Afghanistan tensa melenshir," ta Pentagon odongtari ashi.

"Sepai anizüker aruba yimya nung temelenshi nüngdakra, onoki aji atema atsü-anem

akatsü. Anogoshi onoki tensa asadanger."

US-i aniba sepaitemi Afghanistan nung Taliban-i yimsü asüba 2001 küm October ita atsüngdoka liasü. US nung 9/11 lendong agütsüba dak sendakba Osama Bin Laden aser danga al-Qaeda züngsemtem Taliban-i miimbanga yua liasü.

Antiölen linük anema tasa yangluba nung bendanger

jihadist temi Afghanistan linük mamshitsüsa US sepaitemi inyakogo, anungji America nung ainshitsü temsüa lir, ta US Tir Joe Biden-i ashi.

Afghan Tir Ashraf Ghani-ia sorkar meyong sepaitemi telungpur meta nung yutsütsü asoshi temsüa kumogo, ta ashir, saka bendanger sepaitem anizüker aoba ajanga Afghanistan ya Taliban küboki meyiba aittsü, ta aikati amanger.

## MENUNGRASETER

Asür T. Nungshi Jamir  
Changtongya Town (23.06.2020)

Akümlü nung kodanga amatsü makokba asür Wb. T. Nungshi Jamir, nai onok toktsür asüyimi orr tanü küm ka renteta aruaka onok mulungjang rongjenseta lir. Na onok asoshi akümdaket, tasütait aser temeim moshia aliba tebu tajung ka liasü. Ne dak aketba sempet tajungtem anogoshia onok nükla nung angur aser item jagi onok mulung süneptsür.

~ Temeim Kinungtsü, Chirnurtem, Semchirtem aser Kinungertem

## TASOBA KÜM 85 ABENSABA TENÜNGSANG

Tasoba 23<sup>rd</sup> June 1936  
Wb. OBANGMAR AO, Rtd. Dy. S.P  
(CHUCHUYIMLANG)



"KIBUBAI NI MEYARILASANG KÜ NÜLA SÜR LILA"  
(T. KEN 94:17)

Tsüngremi küm 85 tashi kinungtsü, chirnur aser semchirtem akümdong asütsü wazüka toktsü nung tepela tasoba anogo bilemteta Tsüngrem nem tenüngsang agütsür. Maneni arishi anogo temjena moajang ta onok sarasadem.

Temeim Kinungtsü, Chirnur, Anükapang aser Semchirtem

## India nung '2021 Yamaha FZ-X' saya



covers, engine guard, headlight stays, front fender, fender stay, aser grab-bar ajunga inn/merang agi yanglutsü.

Motorcycle tejaklen forks ya black gators agi meyibanga lir aser light ajunga LED inoktsüogo.

FZ-X nung inoksema yangluba

**New Delhi, Aami/June 22, 2021 (Agencies):** India shishilembadak, Yamaha Motor India-i 'Yamaha FZ-X' motorcycle sayaba sangdongogo. Iba motorcycle jenjang sen 1,16,800 (ex-showroom) alitsü.

Yamaha FZ-X ya 150cc neo-retro motorcycle segment ka alitsü. Yamaha company-i iba FZ-X motorcycle tasenba nung Bluetooth connectivity system inoktsüogo aser iba variant jenjang sen 1,19,800 (ex-showroom) lir. FZ-X nung air-cooled, 149cc engine inoka yanglutsüogo.

Iba engine ajanga 7,250 rpm nung 12.4PS aser 5,500 rpm nung 13.3Nm torque agütsür. Company-i ashiba agi, ola tuluba adokdaksütsü atema motorcycle indang exhaust note tuning sütsüogo. Plastic melen a FZ-X indang fuel tank, side

Bluetooth yagi Communication Control Unit (Yamaha bike tem atema India nung mezüing) den külemi inyakter, koba Yamaha indang Y-Connect app den sendaktepa lir. Iba feature yagi instrument cluster icon ajanga smartphone notifications angutsü. Iba den külemi, maintenance, bike parking location, track fuel consumption, malfunction notification agütsür.

Ano külen, motorcycle nung The Revs Dashboard ajanga data talisa engine rpm, degree of throttle opening, rate of acceleration aser eco-friendly riding indicator tem smartphone nung sayutsü.

Tanga feature tsütsü reprangdangra, FZ-X nung negative LCD console ka den Power Socket aser Side Stand Engine Cut off Switch keta aliba angutsü.

## Euro 2020: Denmark Round of 16-i iogo



Copenhagen, Aami/June 22, 2021: Euro 2020 asayamung Group B nung Denmark-i goal 4-1 agi Russia aokba sülen asayartem pelatepba noksa nung angur.

**Copenhagen, Aami/June 22, 2021 (Agencies):** Parken Stadium, Copenhagen nung Denmark aser Russia na tsüngda Euro 2020 asaya liasü. Denmark-i Russia madak goal 4-1 agi takok ngua parnoki iba asayamung indang Round of 16 tongtetogo.

Group B nung iba asaya takok ya Denmark indang mezüing alitsü aser parnoki Finland o Russia na ajateta point table nung tanabuba jenjang tongtetogo.

Tesüiba anogo 9 tejakdang, Denmark-i mezüing Finland den asayaba mapang, ajungbena dang moapu nung Christian Eriksen laoba sülen, Parken Stadium nung terepranger, asayartem aser ketdangsürtem aoksatapogo. Idangjisa Eriksen nem CPR agüja liasü aser mozüki anir oa pa temang tajungba aküm.

Denmark atema iba asaya

tasak liasü aser European asayamung nung mezüing shilem agir telok - Finland-i goal 1-0 agi parnok akok. Tanabuba asaya nunga, Poulsen-i mezüing goal idaktsüba sülen, Belgium puri goal 2-1 agi Denmark tsükdaktsü.

Copenhagen nung terepranger aikati pusema, Denmark team Group B indang tatembuba asaya tongogo.

Iba asaya nung, Denmark-i mezüing goal idaktsütsü maongka angu aser Mikkel Damsgaard-i minute 38buba nung mezüing goal idakja parnok goal 1-0 agi Russia tejakdang ser asaya tembang.

Break sülen, Roman Zobnin-i mekümdangi metsüba ball ka Yussuf Poulsen-i agizüka minute 59buba nung Denmark atema goal tanabuba idaktsü.

Ajisüaka, Russia-i penalty ka metsütsü maongka ngua Artyom Dzyuba-i minute 70buba nung

par telok atema mezüing goal idaktsü. Andreas Christensen-i minute 79buba nung goal ka idakja Denmark pur 3-1 agi tejakdang aküm.

Tatsüka dang lir, Joakim Maehle-i goal pezübuba idakja Denmark-i goal 4-1 agi Russia tsükdaktsü.

Kasa asayamung asaya tanga ka nung, Belgium-i goal 2-0 agi Finland kokogo. Iba asaya mezüing half tashi telok kati danga goal meinoktsüteni tembang. Tanabuba half nung Finland goalkeeper Lukas Hradecky-i par telok indang nung goal idakja aser minute 81buba nung Romelu Lukaku-i goal ka idaktsüba sülen Belgium-i iba asayamung nung tasembenbuba atonga takok angu.

Finland pur Denmark (3) den point nung tie ser lir, saka goal ajanga Group nung parnok jenjang tasembuba nung lir.

## Tokyo 2020: Olympics nung Denis Shapovalov masayatsü

**New Delhi, Aami/June 22, 2021 (Agencies):** Covid-19 wara süngjema maoba ajanga, aruya aliba Tokyo Olympics nungi Canada nung tennis star Denis Shapovalov tukadokogo.

World number 12, Denis-i, "Canada tenüing nungi shilem agitsü maongka anguba ya ajak dang tuluba aser iba asayamung tongtibang lir, saka tangba Covid-19 tensa süngjema maoba asasangteta aser iba tesashi wara nungi ajak kümzüka ayutsü tebilemba nung kü team aser ni Olympics nung shilem magitsü lemtetogo, ta Twitter ajanga lemsatop.

"Tarutsü nung Canada tenüing nungi Olympic games nung shilem agitsü asoshi yongyar," ta pai ashi.

Shapovalov, shibai taoba küm US Open asayamung quarter-finals tashi tongteta asaya, Geneva asayamung final nung tamakok anguba sülen, anogo ka lir pa tapubang nung timtem aliba ajanga taküm indang French Open nunga pai



shilem magi.

French Open nung tukur külen nungi, Denis-i asayamung ana nung shilem agidanga lir. Wimbledon atema renemshiba shilem ama, tawa London kübok Queen's Club asayamung nung pai shilem agiogo. Honibar iba asayamung semifinal nung pa tsükadok.

Olympics nung shilem magitsü asoshi tesüsa osang agitsü tennis asayar rongnung arishi küm 22 tain Shapovalov alitsü. Taoba hopta, Spain nung Rafa Nadal aser Austria

nung Dominic Thiem napronglai Tokyo nung July 24 nungi August 1, 2021 tashi asayatsü aliba men's tennis tournament nung shilem magitsü osang sangoktsüogo.

Rafael Nadal-i Tokyo Games den külemi aruya aliba Wimbledon 2021 nunga shilem magitsü osang metetdaktsüogo. 20-ben Grand Slam takok angur, Nadal-i pa temang anepalutsü aser tennis wadang atsülangtsü tebilemba nung pai taküm Summer Games nung shilem magitsü lemtet. Nadal-isa Wimbledon 2021 nung shilem magitsü osang jangjatsüogo.

Austria nung tennis star Dominic Thiem-i taküm küm tatemlen New York kübok US Open title atema tokteptsü nükjidong nung, pai aruya aliba Tokyo Olympics nungi tukadoktsü lemtet.

Maneni, Japan tsür Osaka-i Wimbledon nung shilem magitsü, saka Tokyo Games nung asayatsü asoshi lai osang sangoktsüogo.

## Tebur Hockey Team indang captain ama Manpreet Singh shimogo

**New Delhi, Aami/June 22, 2021 (Agencies):** Aruya aliba Tokyo Olympics atema, Mongolbarnü India tebur hockey team indang captain ama Manpreet Singh shimogo. Iba asayamung nung pa den deputy ana - defender Birendra Lakra aser Harmanpreet Singh nati yaritepa team achayangtsü.

Taoba hopta, iba asayamung atema India-i züngsem 16 team ka sangdongogo saka iba mapang team nung lennir tenüing memetetdaktsü liasü.

"Team captain ama mezüing aser taküm agi tasembenbuba Olympics nung India tenüing shilem agitsü maongka anguba asoshi pelar. Team anir shilem agitsü maongka anguba ya tuluka aser nümatanga

Manpreet-i anir India team-i iba League nung junga shilem agia liasü.

Manpreet-i tasembenbuba Olympic Games nung shilem agir alitsü aser pa lenisüba kübok India team-i takok ngua asaya arur, tang world ranking nung parnoki jenjang 4buba ajangzükta lir.

Chief Coach Graham Reid-i, "Tesüiba küm ana nungi, team nung asayar asempronlgai tongti shilem agia arudar aser tang ama tensa tamajungdang, parnok dak asayatsü sempet aser temlungtetba tulu aliba ajanga team nung asayar tasen aika ajungmesogo," ta ashi.

"Olympic squad nung Vice Captain - Birendra Lakra aser Harmanpreet Singh nati team



bilemer," ta Manpreet-i ashi.

"Tesüiba küm ishika nungi, asaya tsütsü onoki temelenshi aika agia tashitait team ka ama asaya aruogo aser alima ajanga asüngba Covid-19 wara tenokdangba liaka, onoki item timtem kokteta aruogo; aser Olympics nung tajungtiba shilem agitsü asoshi nükla yur bendanga agüja inyakogo," ta pai ashi.

Midfielder asayasang Manpreet-i captain ka ama, asayamung balala nung India team anir takok balala nguogo. 2017 küm India team-i Asia Cup takok angu. Iba sülen, 2018 aser 2019 küm atonga India tebur team-i Asian Champions Trophy aser FIH Series Final kokogo. Tesüiba küm pezü tsüngda India Hockey team-i item takok nguogo.

Ano külen, 2018 küm Bhubaneswar nung ayongba World Cup asayamung nunga India team quarterfinal tashi tongteta asayaogo aser COVID-19 ajanga FIH Hockey Pro League thitsütsü telemtetba magidang,

tejakleni aotsü asoshi maneni bendanga agütsür inyaktsü aser iba asayamung nunga tena sempet ajanga team takok leni anitsü imlar," ta pai ashi.

Birendra ya India hockey team nung defender asayar tejen ka lir, shibai London Olympic Games nung asaya liasü, saka 2016 küm pa temekok surgery agitsüsa akümba ajanga Rio Games nung pai shilem magitet.

Ajisüaka, team nung tanaben Birendra dena aser asaya aruba mapang nungi, team atema pai tongti shilem agidar.

Ano külen, Harmanpreet-a 2015 küm senior team nung dena liasü aser pa shilem - dragflicker aser defender nung junga asaya aruogo.

2019 küm, skipper Manpreet masayatetba ajanga Tokyo nung Harmanpreet-i anir India team-i FIH Olympic Test asayamung takok nguogo.

Iba Olympic tenzüka, July 24, 2021 nü India-i parnok indang mezüing Pool stage nung New Zealand den asayatsü terenemba lir.

## BILEMDANGANG

"Pei tajung indang peii koma mejembir."